

# Vijita de gheologs dala Cina tl Museum Gherdëina

Nce chëst ann, per l segondo iede, àn n sada dl'ena passada ai 15 de lugio pudù ti dé l bënëni tl Museum Gherdëina a na grupa de 25 studënc de geologia dla Peking University PKU, ruvei adalersch per na escursion didatica de plu dis tla Dolomites



Dutes y duc a balà deberieida, Bel ti àl sapù!



I studënc y la studëntes cun l professëur Andrea Tintori, nce cumëmber de unëur dl Museum de Gherdëina.



Fotografia de grupa n ucajian dla vijita de gheologs dala Cina tl Museum Gherdëina.

**Museum** - Do la vijita ala sezions de geologia, ert y storia dl Museum de Gherdëina, à la grupa mo pudù se goder dan la Cësa di Ladins i bai poluleres purtei dant dala Grupa de Bal Populer de Santa Cristina y Sëlva. L'ancunteda ie frut de na cunlaurazion per svilupé na vijion globela di prozesc geologics n curelazon cun l mer primurdiel dla Tetide danter la Dolomites y la Cina dl Sud.

## Jiang Dayong y Andrea Tintori

La grupa di studënc de master fova acumpanieda da si professëures, danter chisc Jiang Dayong, studiëus de retii marins dl Triassich, y Andrea Tintori, cumëmber de unëur dl Museum pervia de si studi n con' di pësc füssilisei y l itiosaur de Secëda.

"I crëps y la montes dla Dolomites ne n'ie nia mé de nteres per si belëzes, les reprejenta per uni gheologh dl mond n travert da messëi realisé almanco un n iede te si vita," à auzà ora l professëur Tintori tl Museum: "La geologia ne pössen nia mé mparé sun i libri, zënza udëi cun si uedli i crëps, l sas dla vëtes desferëntes y la relazions danter la unes y l'autres. Zënza chësta esperienza sul post ne deventerà un mei n bon gheologh."

## Geotrail de Bula

Do la prima pert de escursion tl sit Unesco dl Monte San Giorgio, cunesciù per si fossii de pësc y retii marins dl Triassich, y tle Grigne sun l Lech de Como, à la grupa dala Cina te Gherdëina fat n iede l Geotrail de Bula, dedicà ala gran crisa biologica dan 252 milions de ani. Chësc aspet ie per i studënc cinëisc damat nteresant, davia che propi la luegia tipica de referimënt per chësc tēp

- canche la Vita manaciova de descumpari defin sun la Tiera - ie propi tla Cina.

## Gran emuzion

N'otra jita à la grupa fat sun Secëda, che ie de nteres per si pusizion strategica tla evoluzion di crëps, n iede pervia dla relazions danter l fonz de n mer stlut y la sculiera, y sèuraprò per l vulcanism dl Triassich Mesan che vën iló a lum. Nia da desmincë sambën ne n'ie i fossii reses giapei sun Secëda bele dan truep ani y n mostra tl Museum Gherdëina, danter chisc i resc damat reses di pësc plu vedli dl mer antich dla Tetide y dl schilet dl gran itiosaur, de nteres per l stude de chisc orchi dl mer tl tēp dl Ladinich bas, zirca dan 240 milions de ani. Pudëi udëi i resc urigineisei de chësc gran tier, nce sce cunservà mé n pert, ie stata na gran emuzion per i jëuni dala Cina, che se à cialà ju cun marueia nce i autri fossii y duta la outra culezions riches dl Museum Gherdëina pra la vijita meneda cun la diretëura Paulina Moroder.

## Mujiga, bal y aurela curta

Do la vijita tl Museum à la grupa di studënc cinëisc cun si professëures mo pudù se tò pea de bela mprescions di bai traduziunei purtei dant alalergia dala Grupa de bal populer de Santa Cristina y Sëlva, y njunté nscila a si stude la descuvierta de nosta cultura.

La grupa di studënc à da dedò mo vijità l Bletterbach per finé via si vijita a Agordo danter Civetta y Pale de S. Lucano.

Dessegur na bela esperienza che duta la grupa se purterà pea te si memoria per plu ani.

Museum de Gherdëina